



Groupe parlementaire

N° 7605
Entrée le 15.02.2023
Chambre des Députés
Déclarée recevable
Président de la Chambre des Députés
(s.) Fernand Etgen
Luxembourg, le 15.02.2023

Här Fernand Etgen
Präsident vun der Deputéiertechamber
19, um Krautmaart
L-1728 Lëtzebuerg

Lëtzebuerg de 15. Februar 2023

Här President,

Esou wéi d'Chambersreglement et virgesäit, bieden ech lech, dës parlamentaresch Fro un den Här
Ekonomieminister weiderzeleeden.

- 1) Kann den Här Minister eng Tabell presentéieren, wéi vill produzéierend Betriber sech an de Joren 2013 bis 2022 insgesamt zu Lëtzebuerg néiergelooss hunn, aus wéi engem Beräich se stamen, wéi vill Aarbechtsplaze jeeweils entstanen sinn an a wéi enge Gemengen se hire Standuert hunn?
- 2) Kann den Här Minister matdeelen, wéi vill Industriebetriber sech an de Joren 2018 bis 2022 opgrond vu Promotiounsreese vun der Regierung zu Lëtzebuerg néiergelooss hunn?
- 3) Kann den Här Minister seng allgemeng Visioun fir d'Zukunft vum Wirtschaftsstanduert Lëtzebuerg elaboréieren?
- 4) Wéi fonctionéiert de "guichet unique" dee soll nei Demande fir Industriebetriber zu Lëtzebuerg ënnersichen? Wéivill Dossiere goufe presentéiert, a wéivill Fäll gouf eng Decisioun geholl? Wéivill Dossiere goufe positiv aviséiert an a wéi engen Delaieen? Wéivill goufe refuséiert an aus wéi enge Grënn?

Mat déiwem Respekt,

Fernand Kartheiser
Deputéierten



Réponse de Monsieur le ministre de l'Économie, Franz Fayot, à la question parlementaire n°7605 du 15 février 2023 de Monsieur le Député Fernand Kartheiser au sujet de l'avenir de l'industrie au Luxembourg

Et gehéiert zu den Haaptmissiounen vum Wirtschaftsministère, fir derno ze kucken datt zu Lëtzebuerg dat ekonomesch Ëmfeld gënschteg ass fir datt sech nei Betriber grënnen a fir datt déi Entreprises, déi schonns am Land sinn, hir Aktivitéiten ausbauen. Munch Referenzbetriber aus der nationaler Industrie, dorënner Guardian, Euro-Composites an ArcelorMittal hunn zanter 2018, an dat trotz de ville Krisen, Investissementen an d'Moderniséierung an an d'Erweiterung vun hire Produktiounsanlagen vum am ganze ronn enger Milliard Euro ugekënnegt.

Wann de Wirtschaftsministère esou Investissementen finanziell ënnerstëtzt, dann ass dat prioritär fir déi dynamesch an nohalteg Entwécklung vun der nationaler Wirtschaft sécher ze stellen, awer och fir d'Diversifikatioun vun der Ekonomie allgemeng virum ze dreien, andeems ëmmer erëm nei Secteuren an nei Piliere entwéckelt ginn. De Wirtschaftsministère promovéiert an ënnerstëtzt dobäi besonnesch di digital an ekologesch Transitioun bei den Entreprises. Bei de produzéierende Betriber spillen dobäi d'Digitaliséierung, d'Robotiséierung, d'Dekarboniséierung an d'Analysen an d'Verschaffe vun Donnéeën (Industrie 4.0) eng wichteg Roll.

Wéi schonns an der Äntwert vum 22. September 2022 op d'parlamentaresch Fro n°6645 vum honorabelen Deputéierte präziséiert gouf, gëtt den Ament am Kader vun den Aarbechte vum „Haut Comité pour l'industrie“ zesumme mat de betraffene Betriber gekuckt, wéi sech déi Lëtzebuergescher Industrielandschaft an deem Kontext bis 2040 soll entwéckelen. Am Kader vun deenen Aarbechte gëtt och definéiert, wéi eng wirtschaftspolitesch Begleedmoosnamen am Kader vun der nationaler Wirtschafts- an Industriepolitik musse geholl gi fir déi Entwécklung ze ënnerstëtzen.

Opgrund vun den Donnéeën vum STATEC fir d'Joren 2013 bis 2020, kann ee feststellen, datt Zuel vun de produzéierende Betriber di zu Lëtzebuerg gegrënnt goufen relativ konstant ass:

Joer	2013	2014	2015	2016	2017	2018	2019	2020
Industriebetriber di gegrënnt goufen	55	39	35	48	38	40	35	54

Source: STATEC

Den Zuele vum STATEC no, goufen et 2021 ronn 927 Industriebetriber zu Lëtzebuerg, dat hunn deen Ament 2,3% vun all den aktiven Entreprises ausgemaach. Mat iwwer 30.000 Aarbechtsplazen zanter 1995, ass den Emploi an der Industrie relativ stabil.

Eng genee Zuel vun den Néierloosungen vun Industriebetriber als eenzeg an direkt Konsequenz vu Wirtschaftsmissiounen an d'Ausland un ze gi géing ierféiere well et eng ze vill reduzéiert Siicht op d'Aarbecht vun der Wirtschaftspromotioun wier. D'Promotioun vum Commerce extérieur an den Investissementen ass eng Missioun déi, an der Regel, op enger laanger Zäitschinn ze betruechten ass.

D'Promotiounsreese sinn ee ganz wichtegen Deel vun dëser Aufgab, mee natierlech och di permanent Efforte vun allen privaten a staatlechen Acteuren di sech ëm d'Promotioun vum Wirtschaftsstanduert Lëtzebuerg beméien. Fir de Wirtschaftsministère sinn dat op der éischter Plaz déi 9 Luxembourg Trade and Investment Offices (LTIOs) weltwäit. D'Efforte vun all dësen Acteuren, am Zesummespill mat den Promotiounsreese vun der Regierung, droen hiren Deel dozou bäi, dass sech cibléiert Investisseuren zu Lëtzebuerg nidderloossen di esouwuel bei di national an nohalteg ausgeriichte Wirtschaftspolitik passen ewéi och eng Plus-value fir eis Ekonomie duerstellen.

Den Trade and Investment Steering Committee (TISC), deen sech ëm d'Koordinatioun vun der wirtschaftlecher Promotioun a Prospektioun këmmert, huet en themespezifesch interministerielle Comité an d'Liewe geruff. Dëse Comité huet als Missioun den erstallte „Compatibilitéitscheck“ fir nei, grouss Industrieprojete vun deenen e regionalen an nationalen Impakt kann erwaart ginn. De Comité ass zanter Enn 2022 operationell, huet awer nach kee Projet definitiv aviséiert.

Luxembourg, le 23/03/2023

Le Ministre de l'Économie

(s.) Franz Fayot